

ጴጽሮሲ ጸፊዳ ኮይሮ ኪታ ጊዶ ቆፋ

ሃዋሬ ጴጽሮሲ ጸፊዳ ኮይሮ ኪታዛ ጊዶን፡ «ጸሳስ ዶሬቲዳ ዴሬ» ጌቲቲ ጴይጌቲዛይታሲኔ ፑዴሃ ባጋራ ቁሪ ኢሲያ ዴሬን ላሌቲ ዲዛ አማኒዛይታሳ። ህ ኪታስ ዋና ቆፋይ አማኖ ጋሶን ዳሮ ሜቶይኔ ጎዴቴሊ ኢስታ ሶላ ጋኪዳይታ ሚንፊላናሲኔ ዴንፊላናስኮ። ጸፊዚ ሄሳዖ ኦሊዳይ ዬሱሳ ሃይቆ ጊሻስ፡ ሃይቆፔ ዴንሳ ጊሻሲኔ ኢዚ ናምኣንዖ ሃ ሲሚ ያና ዩሳ ሂዶታ ቆንጨሲዛ ዬሱስ ኪርሰቶሳ ሚሺራቾ ቃላ ናባቢዛይታ ቆፍሳናሳ። ዬሱስ ኪርሰቶሲ ካሴ ዴዩዳ ዴሳ ለሚሶ ማላ ጸሊዲ ኢስቲካ ሜቶ ጌንጪ አላናስ ቤሲዛይሳ ቆፍሴስ። ሂይታራ ኡባ ጋሊዲ ሜቶይ ኢስታ አማኖ ሚኖቴላ ፓጪዛይሳኔ ዬሱስ ኪርሰቶሲ ቆንጨዛ ጋላስ ኢስቲ ባስ ቤሲዛ ዋጋ ኤካናይሳ ኢስታ ቆፍሴስ።

ጸፊዚ ኢስቲ ሜቶ ዳንዳያና ማላ ኢስታ ሚንፊላፊካ ሶላራ ሄሳ ናባቢዛይቲ ኪርሰቶሳ ካሊዛይቲ ዴኣናስ ቤሲዛ ዴስ ዳና ማላ ቆፍሴስ።

ሃ ማጻፋይ ኦይኪዳ ኩሜሳ ቆፋ

ጌሎሶ 1:1-2

ጸሲ አሺዛዴ ጊዲዳይሳ ኤሪሶ 1:3-12

ጸሳስ ዱማቲ ዳና ማላ ኢሜቲዳ ዞሬ 1:13—2:10

ሜቶ ዋዴ አማኒዛይታ አላፊቴላ 2:11—4:19

አማኒዛይታ አሸኬቴሊኔ ኢስታ ኦሶ 5:1-11

ኩሻ ቆፋ 5:12-14

¹ ዬሱስ ኪርሰቶሳ ሃዋሬ ጊዲዳ ጴጽሮሳፔ፡ ኣሳ ቢታን ቤቴን ዲዛይታስ ጳንጸሳን፡ ጋላቲያን፡ ቆጶዶቂያን፡ ኢሲያኒኔ ቢቲኒያ ቢታን ላሌቲ ዲዛ ኢንቴስ።

² አዋይ ጸሲ ካሴ ኢንቴና ኤሪዳ ማላ ዶሬቲዳይታስ፡ ዬሱስ ኪርሰቶሳስ ኣዛዜታናሲኔ ኢንቴ ኢዛ ሱላን ኣራጮቲዲ ጌያና ማላ ጲሎ ኣያናን ዱማቲዳ ኢንቴስ ኪያቴሊኔ ሳርቴሊ ዳሮ።

ጌታ ሂዶታ

3 ዩሱስ ኪርስቶስ ሃይቆፔ ዴንዲዳ ገሻስ ኑስ ዴኦ ገዲዳ ሂደታ አሚዳይሲ ባ ገታ ማሮቴላን ኑና ባስ ኦራፋ ናይታ ሂስቲዳ ኑ ጎዳ ዩሱስ ኪርስቶሳ አዋይ ጸሲ ጋላቴቶ።

4 ኢዚ ጳዮንታ፥ ሞሬቶንታኔ ጨጎንታ ላታሶ አንቴስ ሳሎን ጊግሲ ዋሊዴስ።

5 አንቴካ ዉርሴፋ ጋላሳን ቡሮ ቆንጫና አቶቴላስ አማኖ ጋሶን ጸሳ ዋልቃን ናጌቲዴታ።

6 ሃኢ ጉላ ዋዴስ ዱማ ዱማ ፓጨቲ አንቴና ዋዴሲኮካ አንቴ ሄሳን ኡፋዬቲቴ።

7 ሄሲ ሄ ፓጨዚ አንቴ ቦላ ጋኪዛይ አንቴ አማኖዚ ቱሙ ገዲዳይሳ ቆንጪሳናሳ። ጳያና ዋርቃይካ ታማን ፓጨቴስ፤ ዋርቃፌ አጲ ቦንቾ ገዲዳ አንቴ አማኖይካ ሄሳፉ ፓጨታናስ ቤሴስ። ሄሲ ፓጨቲዳ አንቴ አማኖይ ዩሱስ ኪርስቶስ ቆንጪዛ ጋላስ ጋላታስ፥ ቦንቾሲኔ ሳባስ አንቴና ጋላና።

8 አንቴ ዩሱስ ኪርስቶሳ አይፌራ ቤኦንታ ኣጊኮካ አንቴ ኢዛ ዶሴታ፤ ሃኢካ አንቴ ኢዛ ቤኦንታ ኣጊኮካ ኢዛ አማኔታ፤ ጮ ቃላን ቆንጪሳና ዳንዳዮንታ ገታ ቦንቾ ኡፋይስ አንቴ ኡፋዬቲታ።

9 አንቴ ናጊዛ አንቴ ሼምፖይስ አቶቴላ አንቴ አማኖን ዴሚዴታ።

10 ሄ አቶቴላዛ ገሻስ አንቴስ አሜታና ኪያቴላስ ካሴ ናቤቲ ሎኤሊ ዋዚናፔ ፒልጊ ጼሊዳ።

11 ካሴ ኢስታን ዲዛ ኪርስቶሳ ኣያናይ ጸሳፌ ቲዬቲዳይሳ ቦላ ጋካና ዋዬዛኔ ሄ ዋዬዛፔ ጉዬ ኢዚ ዴማና ቦንቾዛ ገሻስ ካሴ ባስ ዋሊዴስ፤ ኢስቲ ቃሴ ሄሲ ዉሪካ ኣይዴ ዋኒ ሃናናኮ ዩሺ ቆፒዳ።

12 ሄ ካሴ ናቤቲ አንቴስ ኦሊዳ ኣቲን ኢስቲ ባስ ኦፋንታይሲ ኢስታስ ቆንጪን ኤሬቲዴስ። ኢስቲ አንቴስ ኦሊዳይ ቦላ ሳሎፔ ከቴቲዳ ጸሎ ኣያና ባጋራ ሃኢ አንቴስ ሚሺራቾ ቃላ ዮቲዳ ኣሳቲ አንቴስ ዮቲዳይሳ ቆንጪሳናሳ፤ ሄሳ ሄ ቃላ ኪታንቻቲካ ቤያናስ አዋቲዳ።

ጸሳስ ዴማቲ ዲስ

13 ሄሳ ገሻስ አንቴ አንቴ ዋዚና ሱሪሲዲ ኦሶስ ጊጌቲቴ፤ ዋጋራ ዴኢቲ። ዩሱስ ኪርስቶስ ቆንጪዛ ዋዴ አንቴ ኢዛ ኪያቴላ ዴማናስ አንቴስ ኩሜላ ሂደታይ ዴኡ።

14 አንቴ ኣዛዜቲዛ ናይታ ገዲዲ ኤሮንታ ዲሼ አንቴ ካሴ ኢዛን ዲዛ ኢታ ቆፋ ካሎፍቴ።

15 እንቴና ጴይጊዳ ጸሳይ ዱማ ጊዲዳ ማላ እንቴካ እንቴ ዱሳን ኡባን ዱማቲቲ።

16 ጋሶይካ፥ «ታኒ ጌሽ ጊዲዳ ጊሻሰ እንቴካ ጌሽ ጊዲቱ» ጌቲቲ ጌሻ ማጸፋን ካሴ ጸፊቲደሰ።

17 ኦናካ ዱማ ሻኪ ማዶንታ ኢሳሰ ኢሳሰ ኢዛዴ ኦሶ ማላ ፒርዲዛ ጸሳ፥ «ኢዚ ኑ ኣዋ» ጊዲ እንቴ ጴይጊኮ ሃይሳ ኣላሜዛን እንቴ ኣማሕኔ ቤቲ ኣሰ ጊዲዲ ዲዛ ዋዴ ኡባን ኢዛሰ ባቢቲ።

18 እንቴ ካሴ እንቴ ኣዋታፔ ላቲዳ ሃዳ ዱሳፊ ዋዜቲዳይ ጳይዛ ቢራን ዋይኮ ዋርቃን ጊዶንታይሳ እንቴ ኤሬታ።

19 ጊዶ ኣቲን እንቴ ዋዜቲዳይ ኢታይኔ ዋሶይ ኢዛ ቦላ ባይንዳ ጌሻ ዶርሳ ማላ ጊዲዳ ኪርሰቶሳ ቦንቾ ሱፋንኮ።

20 ኢዚ ኤሬቲዳይ ሃይሲ ኣላሜዚ ሜዴታናፔ ካሴ ጊዲሺን ሃኢ ቃሴ ወርሴላ ዋዴን እንቴሰ ቆንጨዴሰ።

21 እንቴሰ ኣማኖይኔ እንቴ ሂዶታይ ጸሳን ጊዳና ማላ ዬሱሰ ኪርሰቶሳ ባጋራ ኢዛ ሃይቆፔ ዴንፊዲ ኢዛሰ ቦንቾ ኢሚዳ ጸሳን እንቴ ኣማኔቲታ።

22 እንቴ ኣማኒዛይታ ሱሬ ዋዚናፔ * ሲቃና ማላ ቱማሰ ኣዛዜቲፋን እንቴ እንቴ ኣሳቲላ ጌሺዴታ፤ ሄሳ ጊሻሰ እንቴ እንቴ ጊዶን ኢሶይ ኢሳራ ሎኤሊ ሰቄቲቲ።

23 እንቴ ናምኣንሶ ዬሌቲዳይ ሜርናሰ ሚኒ ዲዛ ጳዮንታ ዴኦ ጸሳ ቃላን ጳዮንታ ዜሬላፊ ኣቲን ጳይዛ ዜሬላፊ ጊዳና።

24 ጌሻ ማጸፋይ ጊዛ ማላ፥

«ኣሾ ማይኢዳይ ወሪካ

ማታ ማላ፤

ኢዛ ቦንቾይካ ወሪካ

ዋራ ጨሻ ማላ፤

ማታይካ ሜሌሰ፤

ጨሻይካ ቆኬሰ።

25 ጎዳ ቃላይ ጊዲኮ
ሜርናሰ ኤቂ ዴሰ።»

እንቴሰ ሳባኬቲዳ ሚሺራቾ ቃላይካ ሄሳ።

2

ዴኦ ሹቺኔ ጌሻ ዴሬ

1:16 ለዌ 11:44-45፤ 19:2 * 1:22 ሱሬ ዋዚናፔ፡ ሱሬ ዋዚናፔ ጊዛይሳ ኢሲ ኢሲ ጌሻ ማጸፋቲ ኩሜላ ዋዚናፔ ጌቲሰ።

1 ሃሳ ጊሻስ ኢታቴል ወርሲ፥ ባሌል ወርሲ፥ ቆጵፔ ቆሞን ሃኖ፥ ቃናቴቴል አይኮ ቆሞ ዘገርስ አንቴፌ ዲጊቴ።

2 ሃኢ ዩሌቲዳ ጉፋ ናይቲ ማል አሞተዛይሳ ማላ አንቴካ አታናሰ፥ ኢዛን ዲጪ ዲጪ ባናሰ ጌሻ አያና ቲሚርቲ ላሞቲቴ።

3 አንቴ ላሞታናሰ ቤሲዛይ ጎዳይ ኪያ ጊዲዳይሳ ሻኪ ኤሪኮ።

4 ሃሳ ጊሻስ ጌዴ ዴኦ ሹች ጊዲዳ ዩሱሳኮ ሸቂቴ፤ ሄ ሹቻይ አሳይ ሌቂ አገዳይሳ ሺን ጸሳ አቻን ጊዲኮ ዶሬቲዳይሳኔ ቦንቾ ዋጋይ ዲዛይሳ።

5 አንቴ ጎዳ ዩሱሳኮ ሸቃናይካ ዴኦ ሹቻ ማላ ጸሎ አያና ዲሳሶ ጊዳና ማላ ኦሴቴታ፤ ሄሳሶካ አንቴ ዩሱሰ ኪርስቶሳ ባጋራ ኡፋይሲዛ አያና ያርሾ ጸሳሰ ሸሻናሰ ጌሻ ቁሴታ ጊዳንዴታ።

6 ጌሻ ማጸፋን፥ «ሄኮ ዶሬቲዳ ቦንቾ ጊዲዳ ኬፋሰ ጉላን ኡቲዛ ሹች ታኒ ጸዮኔን ዋፋና፤ ኢዛን አማኒዛዴይ ዩላቴና» ጊዛ ቃላይ ጸፊቲ ኡቲዴሰ።

7 ሃሳ ጊሻስ አንቴሰ አማኒዛይታሰ ሄ ሹቻይ ቦንቾ ሹቹኮ፤ ሂንኮ ኢዛን አማኖንታይታሰ ጊዲኮ፥ «ሹቻን ኬጺዛ ኬፋ ሂላቲ ሌቂ ዋራ ዩጊዳይሲ ኢዚ ኬፋ ጉላሰ ሁኤ ጊዲዴሰ»

8 ቃሴካ፥ «ሄኮ አሴ ቆጺዛ ሹቻይ ሃይሲች! አሳ ቆጺ ከንዲሲዛ ዛላ ሹቻይ ሃይሳኮ» ጌሰ፤ ኢሰቲ ቃላ አማኖንታ ኢጲዳ ጊሻስ ቆጵቴቴሰ፤ ካሴካ ኢሰቲ ሄሳሰ ዲዛይታ።

9 አንቴ ጊዲኮ ቆማፔ ጌዴ ዳሮ ማላሊሲዛ ኢዛ ፖኦኮ ዴይጊዳ ማላሊሲዛ ጸሳ ኦሶ አዋጃናሰ ዶሬቲዳ ዩሌታታ፥ ካዋ ቄሴታ፥ ጸሲ አንቴና ባሰ ሂሰቲዳ አንቴ ዲማ ዴሬታ።

10 አንቴ ካሴ ጸሳ ዴሬ ጊዴኬታ፤ ሃኢ ጊዲኮ አንቴ ጸሳ ዴሬታ፤ አንቴ ካሴ ጸሲ አንቴሰ ቃጴቶንታ ዴሬኮ ሺን ሃኢ ጊዲኮ አንቴሰ ቃጴቲዴሰ።

ጸሳ አሳንቻታ

11 ታ ሲቆቶ! አንቴ ሃይሳ አላሜዛ ቦላ አማፌኔ ቤቴ አሰ ጊዲዳ ጊሻስ ሹሞፖራ ኦሌቲዛ አሾ አሞቲፋታፔ ሃካና ማላ ታ አንቴና ሃዳራ ጋይሰ።

12 ኦኔ ኤሪዛይ፥ «አንቴና ኢሰቲ ኢታ ኦፊቴሰ» ጊዲ አሳይ ዘገርኮካ ጸሲ ኑና ቤያናሰ ዪዛ ጋላሰ ኣይዛቤቲ አንቴ ኦሶይ

2:3 ማዛ 34:8 2:6 ኢሳ 28:16 2:7 ማዛ 118:22 2:8 ኢሳ 8:14-15

2:9 ኬሳ 19:5-6፤ ኢሳ 43:20-21፤ ዛሬ 4:20፤ 7:6፤ 14:2፤ ቲቶ 2:14፤ ኢሳ 9:2

2:10 ሆሴ 2:23

ሎኦ ጊዲዳይሳ በኢዲ ጸሰ ጋላታና ማላ ኢንቴ ኢስታራ ዲዛ ዋዴ ኢንቴ ኣማሌይ ሎኦ ጊደ።

13 ኢንቴ ጎዳ ዩሱሳ ጊሻሰ ጊዲ ዴሬ ኣይሲዛይታሰ ኣዛዘቴቴ። ካዋይ ቃሴ ኡባፌ ቦላራ ዲዛ ጊሻሰ ካዋሲካ ኣዛዘቴቴ።

14 ዴሬ ኣይሲዛይታሰ ኣዛዘቴቴ፤ ኢስቴ ኢታ ኦሊዛይታ ቃጸያናሲኔ ሎኦ ኦሊዛይታ ጋላታናሰ ካዋፔ ከቴቲዛይታ።

15 ኢንቴ ሎኦ ኦሶን ሃንኮ ኤራይ ባይንዳ ኤያቴላን ሃሳይዛይታ ጮኡ ሂስታና ማላ ሂሲካ ጸሳ ሼኔ።

16 ኢንቴ ጸሳሰ ኦሊዛ ኣሳታ ማላ ጊዲዲ ሂርጋይ ባይንዳ ዴኢቴ ኣቲን ኢንቴ ኢንቴ ሼኔ ማላ ዲዛ ዱሳ ኢታቴላ ካሚዛ ሚሽ ሂሰቶፍቴ።

17 ኣሰ ኡባካ ቦንቺቴ፤ ኣማኒዛይታ ሲቂቴ፤ ጸሳሰ ባቢቴ፤ ካዋ ቦንቺቴ።

ከርሰቶሳ ዋዬቴላ ሌሚሶ

18 ኢንቴኖ ኣሳሰ ኦሊ ኣቂዛይቶ! ኢንቴና ኦሲሲዛ ጎዳታሰ ቦንቺን ኣዛዘቴቴ፤ ኢንቴ ኣዛዘታናይ ሎኦታሲኔ ኣሽኬታሰ ጸላ ጊደንታ ሃንኮ ኢታታሳራኮ!

19 ኣሲ ጋላቴቲዛይ ጮ ቆሂቴሼ፤ ሂሲካ ጸሳ ጊሻሰ ጊዲ ዳንዳያና።

20 ኢንቴ ኢታ ኦሊዳ ጊሻሰ ቃጸዬቴሼ ዳንዳይኮ ኢንቴሰ ኣዛ ጋላታይ ዳኔ? ኢንቴ ሎኦ ኦሊዲ ዋዬ ኤኪሼ ዳንዳይኮ ኢንቴ ጸሳፌ ጋላታ ኤካንዴታ።

21 ኢንቴ ጸይጌቲዳይካ ሂሳሳ፤ ኢንቴ ኢዛ ሌሚሶ ካላና ማላ ከርሰቶሲ ኢንቴ ጊሻሰ ዋዬ ኤኪዲ ኢንቴሰ ሌሚሶ ጊዲዴሰ።

22 ኢዚ ኣይኮ ናጋራካ ኦሊቤና፤ ኢዛ ዶናን ጌኔይ ቤቲቤና።

23 ኣሳይ ኢዛ ጫዪሺን ኢዚ ዛሪ ጫዪቤና። ዋዬቴሼ ባና ቱሙ፡፡ ፒርዲዛ ጎዳሰ ሃዳራ ኣሊ ኢሚዴሰ ኣቲን ሃሎ ከሳና ማንዲቤና።

24 ኦኒ ናጋራፔ ሻኬቲዲ ጸሎቴላን ዳና ማላ ኢዚ ባርካ ባ ኣሸን ኦ ናጋራ ማሰቃሌ ቦላ ቶኪዴሰ፤ ኢንቴ ኢዛ ማዱንላን ፓጺዴታ።

25 ኢንቴ ጳይዳ ዶርሳታ ማላ ቶይላቲዴታ፤ ሃኢ ጊዲኮ ኢንቴ ሼምፖ ሄሚዛይሳኮኔ ናጊዛይሳኮ ሲሚዴታ።

3

አዚና ጊሻሲኔ ማቺ ጊሻሰ

1 ሃሳቡካ ማቺቶ! አንቲ አንቲ አዚናታሰ አዛዜቲቴ። ሃሳብ ኢሲ ኢሲ አዚናቲ ጸሳ ቃላ አማኖንታይታ ጊዲኮካ ጮ ማላ ባ ማቺታ ሎኤቴላን ጸላ ሲሞንታ ኣጌቴና።

2 ኢስቲ ሲማና ዳንዳይዛይ አንቲ ጌሻቴላኔ አንቲ ኣሴ ቦንቺዛ ዱሰ ዲዛይሳ ቤኢዲኮ።

3 አንቲ ሎኤቴላ ጮ ማላ ሁኤ ዳላኒኔ ዋርቃን ጌጾቴላን፤ ኣልኦ ማይኦ ማይኦን፤ ጮ ማላ ኣይፊን ቤቲዛ ጌጾን ጊዶፖ።

4 አንቲ ሎኤቴላ ጸሳ ሲንላን ዋጋራ ዲዛ ኬሂ ቦንቺቲዳዚኔ ቆዮንታ ጌጾን፤ ኣሽኬቴላን፤ ኣዳቴላኒኔ ኣያናን ጌጾቴዳ ዋዚና ጋርሳን ቆቴቲ ዲዛ ጊዶ ዋዚና ሎኤቴላ ጊዶ።

5 ቤኒ ዋዴ ባ ሂዶታ ጸሳን ኦሊዳ ጌሻ ማጫሳቲ ጌጾቴዳይ ሃይሳ ማላና፤ ኢስቲ ባ አዚናታሰ አዛዜቲዳ።

6 ኢስቲ አዛዜቲዳይካ ሳራይ ኣብራሃማ፤ «ታ ጎዶ!» ጋዳ አዛዜቲዳይሳ ማላ፤ አንቲካ ሎኦ ሚሽ ኦሊኮኔ ኢሲ ኢታ ሚሽ አንቲና ዳጋንሶንታ ኣጊኮ አንቲ ሳራ ናይታ።

7 አዚናቶ! አንቲ አንቲ ማቺታራ ኣኬካን ኢሲፊ ዴኤቴ፤ ኢስቲ አንቲፊ ዳቡራንቻ ሜጴቴላ ጊዲዳ ጊሻሲኔ ቃሴካ ጸሲ ጮ ኪያቴላን አሚዛ ዴኦ ኢስቲ አንቲናራ ኢሲፊ ላታናይሳ ጊሻሰ አንቲ ኢሰታ ቦንቺቴ፤ አንቲ ሃሳብ ኦሊኮ አንቲ ዋሳ ቆጶዚ ሚሽ ዴና።

ሎኦ ኦሊዛ ጊሻሰ ዋዴ ቤኦ

8 ሃሳፊ ኣሳ ባጋራ ቃሴ አንቲ ኢሶይ ኢሳራ ሲቆን ዲቴ፤ ሃራ ኣሳ ቦላ ጋኪዛ ሜቶ አንቲ ሜቶ ማላ ጴሊቴ፤ አንቲ አንቲ ጋርሳን ኢሻንታ ማላ ሲቄቴቴ፤ ኣሽኬታኔ ኪያታ ጊዲቴ።

9 ኣንጂቴ ኣቲን ኢስታሰ ኢታ ጫሻሰ ጫሽ ዛርፒቴ፤ አንቲ ዴይጌቴዳይ ሃሳብ ኦሊዲ ኣንጅ ላታናሳ።

10 ጌሻ ማጻፋይ ጊዛ ማላ፤ «ዴኦን ዳና ኮይዛይኔ ሎኦ ጋላሳታ ቤያናሰ ኮይዛ ኣሲ ባ ዳናፔ ኢታ ሃሳዮንታ ማላኔ ባ ሜቴርሻቲካ ጌኔ ሃሳዮንታ ማላ ናጌቶ።

11 ኢታ ዮኦፔ ሃኮ፤ ሎኦ ኦሶ፤ ሳርቴላ ኮዮኔ ካሎ።

12 ጎዳ አይፌቲ ጸሎታ ባጋ ጸሌቴስ፤ ኢዛ ሃይላቲካ ኢስታ ዋሳ ሲያናስ ዶያ ዴቴስ፤ ሂንኮ ኢታ ኦሊዛይታ ጊዲኮ ጎዳይ ባ ሃንቆ አይፌሶ ቤሳና» ጊዴስ።

13 ኢንቴ ሎኦ ኦላናስ ሚኔቲኮ ኢንቴ ቦላ ኢታ ሚሽ ጋላናይ ኦኔ?

14 ኢንቴ ሎኦ ኦሊዳ ጊሻስ ዋዬ ቤኢኮካ ኢንቴ ኣንጆ ኤካና፤ ኣሳይ ኢንቴ ቦላ ኢታ ኦላናስ ማንዴቲዛይሳስ ባቦፍቴኔ ዳሮ ቆፖፍቴ።

15 ጎዳ ኪርሰቶሳ ኢንቴ ዋዚናን ቦንቲቴኔ ኢዛ ኢንቴ ዴኦስ ጎዳ ሂስቲቴ፤ ኢንቴስ ዲዛ ሂዶታ ጊሻስ ኢንቴና ኦይቲዛይታስ ኡባስ ዛሮ ኢማናስ ኡባ ዋዴ ጊጌቲ ኡቲቴ።

16 ኢንቴ ኢስታስ ኢማና ዛሮይ ቃሴ ኣሽኬቴላኒኔ ቦንቸን ጊዶ፤ ኢንቴ ኪርሰቶሳይታ ጊዲዳ ጊሻስ ኢንቴስ ዲዛ ሎኦ ኣማሌዛ ጊሻስ ኢታ ሃሳይዛ ኣሳይ ባ ኢታ ሃሳያን ዬላታና ማላ ኢንቴስ ሎኦ ቆፋይ ዴኦ።

17 ጸሳ ሼኔ ጊዲኮ ኢንቴ ኢታ ኦሶ ኦሊዲ ዋዬታናይሳፌ ሎኦ ኦሶ ኦሊዲ ዋዬቲኮ ሎኦ።

18 ኪርሰቶሲካ ኦና ጸሳኮ ሺሻናስ ኢዚ ባ ሁኤስ ጸሎኮሺን ሃንኮ ጸሎ ጊዶንታ ኦ ናጋራ ጊሻስ ናምኣንፊቶንታ ማላ ኢሲቶ ዋዬቲዲ ሃይቂዴስ። ኢዚ ኣሾን ሃይቂዴስ፤ ኣያናን ጊዲኮ ፓዲዴስ።

19 ሄ ኣያናን ቃሾ ኬላን ዲዛ ሺምፖታኮ ቢዲ ኢስታስ ሚሺራቾ ቃላ ዮቲዴስ።

20 ሄይቲ ሄን ዋይኔ ኬላን ዲዛ ሺምፖቲ ካሴ ኖሄ ዋዴ ማርካቤዚ ኦሴቲ ጊጊሺን ኢስቲ ሰማና ማላ ጸሲ ዳንዳያን ናጊሺን ኦኒ ኔስ ኣዛዜቶኮ ጊዲይታ። ሄ ማርካቤዛን ጌሊን ሃላፌ ኣቲዳይታ ቆዳይ ኦስፑን ጊዲዳ ጉላ ኣሳታ ጸላ።

21 ሄሲ ሄ ሃሊ ሃኢ ቃሴ ኢንቴ ኢዛን ኣቲዛ ጸንቃታ ለሚሶ፤ ሃይሲ ጸንቃታይ ቂታ ቦላ ጌያናስ ሚጩቴሊ ጊዶንታ ጌሻ ቆፋ ኤካናስ ጸሳኮ ሺሺዛ ዋሳ። ኢዚ ኢንቴና ኣሻናይካ ዬሱስ ኪርሰቶሳ ዴንላ ባጋራ።

22 ኢዚ ፑዴ ሳሎ ቢዲ ሃኢ ጸሳ ኣቻን ዴስ፤ ኪታንቻቲኔ ጎዳቴሊ ኢስታስ ዲዛ ዋልቃማቲካ ኢዛስ ሃሬቲዳ።

4

ጌሻቴላን ዱስ

¹ ከርሰቶሲ ባ አሾን ዋዬ ኤኪዳ ጌሻስ አንቴካ ኦላ ኦሌቲዛ ሚሼ ጌዲዳ አሳ ማላ ሃይሳ ሃ ቆፋን ሚኒዲ ጌጌቲቲ፤ ባ አሾን ዋዬ ቤኢዳ አሲ ናጋራ ኦሶ አጌዴስ።

² ሄሳፌ ጉዬ ባ ዲዛ ዋዴ ኡባን ኢዚ ዳናይ ኢታ አሾ አሞቴላ ኦሶን ጌዶንታ ዲሼ ጸሳ ሼኔ ፖሎና።

³ ሂንኮ ጸስ ኤርንታ አሳይ ኦሊዛይሳ ማላ አንቴ ጮ ሚላ ዬዳ ዱሳን አሾ አሞን፥ ማሶን፥ ኦጌይ ባይንዳ ካሳን፥ ዋጋፔ አሊ ኡዬዲ ዱሩሳኒኔ ሃራሲዛ ኤቃ ጎይኖን ካሴ አንቴ አሊዳ ዋዴዚ አንቴስ ጌዳና።

⁴ ሃኢ ጌዲኮ አንቴ ሃ ዮኦዛን ኢስታራ ዋጋይ ባይንዳ ቂዲ ቂደንታ ጌሻስ ኢስቲ ማላሌቴቲሲኔ አንቴና ጫዬቲስ።

⁵ ጌዶ አቲን ሃይቂዳይታ ቦላኔ ፓጻ ዲዛይታ ቦላ ፒርዳናስ ገጊ ኡቲዳይሳስ ኢስቲ ዛሮ አማና።

⁶ ሃይቂዳይታሳራ ሚሺራቾ ቃላይ ዮቴቲዳይ ሄሳ ጌሻሳ፤ ሄሳሶካ አይ አሳ ቦላካ ፒርዲዛ ማላ ኢስታ አሾ ቦላ ፒርዳና፤ ኢስታ ሼምፖይ ጌዲኮ ጸሲ ዲዛ ማላ ዴኦን ዴያና።

ጸሳ አሞታታ ዋጋራ ጎኤቴላ

⁷ ሄሳ ጌሻስ ዋዴ ዉርሴሊ ማቲዴስ፤ አንቴ ሚኒ ዋሳናስ ዳንዳያና ማላ ዋጋራ ዲቴኔ ዋፑ ጌዳ ቆፋይ አንቴስ ዴኦ።

⁸ ሲቆይ ዳሮ ናጋራ ካሚዛ ጌሻስ ሃራፔ ቦላራ አንቴ አንቴ ጋርሳን ሎኤሊ ሲቄቲቲ።

⁹ ዙዙንሊ ባይንዳ ኢሶይ አሳ አማላቴላ ሞኪ ኤኪቲ።

¹⁰ ዱማ ዱማ ጌዲዳ ጸሳ ኪያቴላ አሞታታ አማኔቴላን ኦይኪዲ አንቴፌ ኢሲ ኢሲ አሲ ባስ አሜቲዳ ጸሳ ኪያቴላ አሞታን ሃራ አስ ማዶ።

¹¹ ታማርሲዛዴይ ጸሳ ቃላ ታማርሲዛ ማላ ታማርሶ፤ ሃጋዚዛዴይ ጸሲ ኢዛስ አሚዛ ዋልቃን ሃጋዜ፤ ሄሳ ማላን ጸሲ ዬሱስ ከርሰቶሳ ባጋራ ሃኒዛ ኡባን ጋላቴታና፤ ቦንቾይኔ ጎዳቴሊ ሜርናፔ ሜርና ጋካናስ ኢዛስ ጌዶ። አሚን!

ሜቶ ዳንዳዮ

¹² ታ ሲቆቶ! አንቴ ታማ ማላ ፓጪዛ ሜቶ ጌዶን ጌሊዛ ዋዴ ሄሳ ማላይ ካሴ ባይንዳ ኦራላ ሚሺ ጋኪዳዝ አንቴስ ሚሳቲን ማላሌቶፍቲ።

13 ሄሳፌ ቦላራ ኪርሰቶሳ ቦንቾይ ቆንጨዛ ዋዴ ኢንቴ ኬሂ ኡፋዬታና ማላ ኢንቴ ኢዛራ ኢዛ ዋዬዛ ኤኪዛይታ ጊዲዳ ማላ ኡፋዬቲቴ።

14 ኢንቴ ኪርሰቶሳ ሱንላ ገሻስ ጫዬቲኮ ቦንቾ ኣያናይ ሄሲካ ጸሳ ኣያናይ ኢንቴ ቦላ ሼምፒዛ ገሻስ ኡፋዬቲቴ።

15 ኢንቴፌ ኦና ቦላካ ሜቶይ ጋኪኮ ሄሳዴይ ሼምፖ ዋዲዳ ኣሳ ማላ፣ ካይሶ ማላ፣ ኢታ ኦሊዳ ኣሳ ማላኔ ኣሳ ዮኦ ጊዶ ጮ ዋዲ ጌሊዳዴ ማላ ጊዶ።

16 ኢዚ ኣማኒዛዴ ጊዲዳ ገሻስ ኢዛ ቦላ ጋኪዛ ሜቶይ ዲኮ ቃሴ ኪርሰቶሳ ሱንላን ኢዚ ጸሳ ጋላቶ ኣቲን ዬላቶ።

17 ፒርዳይ ዶሜታናስ ዋዴይ ማቲዴስ፤ ሄ ፒርዳይ ዶሜታናይ ኮይሮ ጸሳ ኣሳ ቦላኮ! ሂስቲን ፒርዳይ ኦናን ዶሚኮ ጸሳ ሚሺራቾ ቃላስ ኣዛዜቶንታ ኢዲዳ ኣሳ ወርሴሊ ኣይ ጊዳኔ?

18 ጌሻ ማጻፋይ፣ «ጸሎይካ ዋይዲ ኣታናዝ ጊዲኮ፣ ሃንኮ ጸሳስ ጎይናንታ ኣሳይኔ ናጋራንቻቲ ዋናንዴቶ?» ጊዛ ማላ።

19 ሄሳ ገሻስ ጸሳ ሺኔ ማላ ዋዬቲዛ ኣሳቲ ባናቴላ ኡባ ኣማኔቲዳ ባና ሜዲዳይሳስ ሃዳራ ኢሚዲ ሎኦ ኦሶ ኦሶንታ ኣጎፊቶ።

5

ጸሳ ኣሳ ኣይሳናስ ኢሜቲዳ ዋጋ

1 ሄሳ ገሻስ ታኒካ ኢስታራ ኢሲፌ ዋሳ ኬላስ ጨማኔ ኪርሰቶሳ ዋዬዛስ ማርካ ጊዲዳ ታኒ ቃሴካ ቡሮፔ ቆንጫና ቦንቾዛ ጊሼታናስ ዲዛ ታኒ ኢንቴናራ ዲዛ ዋሳ ኬላ ጨማታ ዞራይስ።

2 ኢንቴስ ሃዳራ ኢሜቲዳ ጸሳ ዉዴ ናጊቴ፤ ኢዛ ዉዴዛ ዋልቃራ ጊዶንታ ጸሲ ኮይዛ ኦጌራ ዶሳን ሄሚቴ፤ ሚሻስ ዪቄቴላን ጊዶንታ ሃጋዘናስ ዋዚናፔ ኮሻን ጊዶ።

3 ሄሳሶካ ኢንቴ ኣላፌቴላ ጋርሳን ዲዛይታ ዬዲ ሃርን ጊዶንታ ዉዴዛስ ሎኦ ለሚሶ ቤሶን ጊዶ።

4 ኢንቴ ሄሳሶ ኦሊኮ ሃንኮ ዋና ሄሚዛይሲ ቆንጨዛ ዋዴ ኢንቴ ዋሬቶንታ ቦንቾ ኣኪሊሌ ኤካና።

5 ሄሳሶካ ኢንቴና ናቴላቶ! ኢንቴ ጨማታስ ኣዛዜቲቴ፤ ኢንቴ ዉሪካ ኣሽኬቴላ ኣፋላ ማላ ማይኢዲ ኢሶይ ኢሳስ ኦሊቴ። «ጸሲ

ኦቶሪዛይታ ኢጼሰ፤ ኣሽኬታሰ ቃሴ ባ ኪያቴል ኢሜሰ» ጌቴቴ ካሴ ጌሻ ማጻፋን ጸፊቲዴሰ።

⁶ ሄሳ ጊሻሰ ጸሲ ባ ዎዴን ጶቄ ሂስታና ማላ ሚኖ ጸሳ ኩሼፔ ጋርሳራ ኢንቴና ዚቄ ሂስቲቴ።

⁷ ኢዚ ኢንቴሰ ቆፒዛ ጊሻሰ ኢንቴና ሜቲዛ ቆፋ ወርሲ ኢዛ ቦላ ይጌቴ።

⁸ ዎጋራ ዴኢቴ! ቤጌቴ! ኢንቴ ሞርኬ ዳቡሎሲ ባሰ ሚታና ሚሽ ኮዪሼ ጸጊዛ ጋሞ ማላ ኢንቴ ዩሾን ሃርቡቄሰ።

⁹ ኣላሜ ኩሜላን ዲዛ ኢንቴ ኢሻቲ ሄሳ ማላ ሜቶ ኤካና ዲዛይሳ ኢንቴ ኤሪዲ ኣማኖን ሚኒ ኤቂዲ ኢዛራ ኤቄቲቴ።

¹⁰ ኢንቴ ጉላ ዎዴሰ ዋዬቲዲይሳፊ ጉዬ ኢንቴና ኪርሰቶሳ ባጋራ ሜርና ቦንቾሰ ዴይጊዳ ኪያቴል ኡባሰ ጎዳይ ኢዚ ባርካ ኢንቴና ጋኪዳ ዋዬዛፔ ኣሻና፥ ማዳናኔ ሚንፊላና ቃሴካ ዳዝጊሳና።

¹¹ ቦንቾይኔ ዎልቃይ ሜርናፔ ሜርና ጋካናሰ ኢዛሰ ጊዶ። ኣሚን።

ወርሴላ ሳሮካ

¹² ታኒ ኢዛን ኣማኔቲዳ ኢሻ ጋ ቆፒዛ ሲልዋኖሳ ባጋራ ሃይሳ ኪታዛ ቃንላራ ኢንቴሰ ጸፋዲሰ፤ ታ ሄሳ ጸፊዳይ ኢንቴና ዞራናሲኔ ሃይሲ ቱሙ ጸሳ ኪያቴል ጊዲዲይሳ ኢንቴሰ ቆንጨሳናሰ ጋዳኮ፤ ሄሳ ጊሻሰ ኢንቴ ሃይሳን ጸሳ ኪያቴላን ሚኒ ኤቄቴ።

¹³ ኢንቴ ማላ ዶሬቲዳራ ባቢሎኔን ዲዛ ሚቾ ጊዲዳ ዎሳ ኬላያ ኢንቴሰ ሳሮካ ሺሻዉሰ። ታ ና ማርቆሲካ ኢንቴና ሳሮኬሰ።

¹⁴ ኣማኖ ሲቆቴላን ኢንቴ ኢሶይ ኢሳ ዬሪ ዬሪ ኤኪዲ ሳሮኬቲቴ።

ኢንቴሰ ኪርሰቶሳይታሰ ኡባሰ ሳሮይ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b